

– E – phenela, – ake thagareskere chhaya lava! Taman mislinavas te avav lasa khere, te sikavav la tumenge. Lakere manusha pishim mangle te keras o byav, ta hem pishim te ingalav la me khereste.

– Nashti – phendzhas o thagar – chuka te ovel, sar tu vakeresa! Tu na phuchlan man, ni pale te daya, kana te prandines! Tu na shundzhan amen, mo lafi chhinyardzhan! Dalkheske akana, ka khelas tusa tabla. Me te mardzhom tut ki table, ka ikalav ti yakh, tu te mardzhan man – tu ka ikales mi yakh. Ovela li?

O raklo dikhlyas pe dades i phendzhas:

– Te mangesa te ikales mi yakh, ikal la! Me tiri yakh nashti ikalava!

O thagar vakerdzhas leske:

– Kavka si basi. Manges, na manges, ka ikalas amare yakha.

I o chhavo irinela pe dadeske:

– Sar ka vakeres baba, chuka ka ovel!

– Ttside – phendzhas o dad – anglal mande. E-e-e, okoriga, mashkar ko drom ka khelas, dur atar diz.

I kalela les atar palate, ama i Gyulizara, dimi but dehala les, akatar-okotar, pakyarela pes, garavela pes te dikhel, kate ka ingalel les o dad, te dikhel so ka ovel lakere romesa. Zhana o thagar thay leskoro chhavo turyal ekhe lenyate – bari len, avri, dur atar diz i beshle othe te khelen tabla. O raklo marela les i phenela:

– Baba, ake me mardzhom tut ki tabla!

– Ikal – phenela o dad – mi yakh!

– Mo baba, tiri yakh nashti ikalava, me sinom to chhavo, me nashti kerava davka!

– Tu veche kalke prandimasa, bi puchimaskoro, ikaldzhan mi yakh. Ikal akana chaches mi yakh, soske me ka ikalav tiri!

– Ikal, baba! Tu baryardzhan man! Sar ka ikalav me dadeskiri yakh?!

– Shukar! Ovela te khelas da ekvar?

– Ovela!

– Akana, me te mardzhom tut – phenela o thagar pe chhaveske – me ka ikalav ti yakh.

– Shukar! Ikal!

Khelena pale. O raklo maksus mukela pe dades te marel les ki tabla, te dikhel dali chaches leskoro dad ka ikalel leskiri yakh. I o dad birden shtom bitinela o khelibe i marela e rakles, ikalela i yakh leskiri, chhivela la. A i Gyulizara garavela pes ko kare, ko kashta, rovela, dikhela o thagar sar ikalela pe chhaveskiri yakh, sar pishtinela o raklo dukhendar. Rovel a i chhayori, ama nishto nashti kerela. O thagar phenela: